

廣雅疏證

冊五

廣西通志

卷一

廣雅疏證卷第九上

高郵王念孫學

釋天

太初氣之始也生於酉仲清濁未分也太始形之始也生於戌仲清者為精濁者為形也太素質之始也生於亥仲已有素朴而未散也三氣相接至於子仲剝判分離輕清者上為天重濁者下為地中和為萬物

列子天瑞篇云太初者氣之始也太始者形之始也太素者質之始也氣形質具而未相離故曰渾淪又云一者形變之始也清輕者上為天濁重者下為地沖和氣者為人故天地含精萬物化生易乾鑿度同小雅采薇正義引詩緯云陽生酉仲陰生戌仲太平御覽引詩推度災云陽本為雄陰本為雌物本為魂雄生八月仲節號曰太初又引乾鑿度云雌生戌仲號曰太始雄雌俱行三節而雄合物魂號曰太素

天地辟設人皇以來至魯哀公十有四年積二百七十六萬歲分為十紀曰九頭五龍攝提合維連通序命循蜚因提禪通疏訖

續漢書律曆志引蔡邕議云元命苞乾鑿度皆以為開闢至獲麟二百七十六萬歲文選魯靈光殿賦注引春秋命曆序云皇伯皇仲皇叔皇季皇少五姓同期俱駕龍號曰五龍又云入皇九頭宋均曰九頭九入也各本攝譌作挺維譌作雄連譌作建循蜚譌作脩輩疏訖譌作流記司馬貞補三皇紀引春秋緯云十紀一曰九頭紀二曰五龍紀三曰攝提紀四曰合維紀五曰連通紀六曰序命紀七曰循蜚紀八曰因提紀九曰禪通紀十曰疏訖紀禮記正義引六藝論注云六紀者九頭紀五龍紀攝提紀合洛紀連通紀序命紀書正義引廣雅云十紀者九頭五龍攝提合維連通序命循蜚因提禪通疏訖今據以訂正

年紀

東方昴天東南陽天南方赤天西南朱天西方成天西北幽天北方

玄大東北變天中央鈞天

呂氏春秋有始覽云天有九野中央曰鈞天東方曰蒼天東北曰變天北方曰玄天西北曰幽天西方曰顛天西南曰朱天南方曰炎天東南曰陽天開元占經天占篇引尚書考靈曜云東方暉天西方成天南方赤天餘與呂氏春秋同蓋廣雅所本也暉與昇同楚辭天問九天之際安放安屬王逸注亦與考靈曜同變各本譌作蠻初學記太平御覽引廣雅竝作變今據以訂正又初學記太平御覽引廣雅赤天竝作炎天

九天

天園廣南北二億三萬二千五百里七十五步東西短減四步周六
億十萬七百里二十五步從地至天一億一萬六千七百八十七里
半
下度地之厚與天高等

億與億同各本園廣譌作園闕周官大司徒疏開元占經天占篇
法苑珠林日月篇太平御覽竝引廣雅天園廣南北二億三萬三
千五百里七十五步今據以訂正又各本八十七里下脫半字大
司走疏引廣雅從地至天一億一萬六千七百八十七里半開元
占經初學記太平御覽法苑珠林引廣雅竝作八十一里半雖一
與七異文而里下皆有半字今據補案此條天度里數與下條宿
度里數不同則所采非一人之說又案周髀經云天離地八萬里
淮南子天文訓云天去地億五萬里張衡靈憲云八極之維徑二
億三萬二千三百里南北則短減千里東西則廣增千里自地至
天半於八極則地之深亦如之論衡說日篇云天行三百六十五
度凡積七十三萬里海外東經注引詩含神霧云天地東西二億
三萬三千里南北二億三萬一千五百里藝文類聚引春秋元命
包云天周九八十一萬里又引三五曆紀云天去地九萬里開
元占經天占篇引洛書甄耀度云天地相去十七萬八千五百里
又引孝經援神契云周天七衡六閏者相去萬九千八百三十三
里三分里之一合十一萬九千里又引關令內傳云天地南午北
子相去九十一萬里東卯西酉亦九十一萬里四隅空相去亦爾
天去地四十萬九千里以上諸書所言天度與廣雅或大同小異
或相去懸絕其廣袤里數不知據恆星天言之乎抑據
日月五星天言之乎既無定法可憑今皆存而不論

天度

東方七宿七十五度南方七宿百一十二度西方七宿八十度北方七宿九十八度四分度之一四方凡三百六十五度四分度之一一度二千九百三十二里二十八宿閒相距積一百七萬九百一十三里徑三十五萬六千九百七十一里

此謂赤道度也開元占經二十八宿占引劉向洪範傳云東方七宿七十五度北方七宿九十八度四分度之一西方七宿八十度南方七宿百一十二度淮南子天文訓云星分度角十二克九氏十五房五心五尾十八箕十一四分一斗二十六牽牛八須女十一二虛十危十七營室十六東壁九奎十六婁十二胃十四昂十一畢十六觜壽二參九東井三十三輿鬼四柳十五七星七張翼各十八軫十七月令正義引尚書考靈耀云周天三百六十五度四分度之一一度二千九百三十二里千四百六十一分里之三百四十八周天百七萬一千里徑三十五萬七千里說與廣雅小異又案徑三十五萬六千九百七十一里各本皆脫一字周官大司徒疏引廣雅已與今本同今以圍三徑一計之當有一字續漢書郡國志注引帝王世紀周天積一百七萬九百一十三里徑三十五萬六千九百七十一里義本廣雅今據補

宿度

東北條風東方明庶風東南清明風南方景風西南涼風西方闐闐風西北不周風北方廣莫風

淮南子天文訓云何謂八風距日冬至四十五日條風至四十五日明庶風至四十五日清明風至四十五日景風至四十五日涼風至四十五日闐闐風至四十五日不周風至四十五日廣莫風至史記律書云不周風居西北維主殺生廣莫風居北方廣莫者言陽氣在下陰莫陽廣大也條風居東北維主出萬物條之言條治萬物而出之明庶風居東方明庶者明衆物盡出也清明風居東南維主風吹萬物景風居南方景者言陽氣道竟涼風居西南維主地地者沈奪萬物氣也闐闐風居西方闐者倡也闐者藏也言陽氣道萬物闐黃泉也北堂書鈔引春秋考異郵云條者生也明庶者迎衆也清明者精芒也景者大也言陽氣長養也涼者寒也陰氣行也闐闐者咸收藏也不周者不交也言陰陽未合化也廣莫者大莫也開陽氣也隱五年左傳正義引易通卦驗條風作調風說文作融風各本西南西北下竝有方字後人以意加之也上文釋九天之名四隅皆省一方字此條內東北條風東南清明風亦無方字今據刪

八風

昌光握譽可錯持勝履子

後漢書班固傳注引河圖云昌光出軫五星聚井太平御覽引符瑞圖云昌光者瑞光也見於天漢高受命昌光出軫晉書天文志

二云昌光赤如龍聖人起帝受終則見易是類謀
二云王察可錯一角九尾握譽持勝屢予皆未詳

祥氣

格擇旬始天狗枉矢氛侵僂譎冠珥

擇或作澤司馬相如大人賦云建格澤之脩竿兮總光耀之采旌
巫咸云旬始出於北斗彗星而為髻說苑辨物篇云櫟槍彗字旬始
帝占云格澤者如炎火之狀上黃下白從地而上下大上銳又引
流星色蒼黑蛇行望之如有毛目長數匹著天史記天官書與巫
咸黃帝占同釋名云枉矢言其先行若射矢之所至也開元占經
流星占篇引巫咸云流星有先見人面墜地若不至地望之有足
名曰天狗天官書云天狗狀如大奔星有聲其下止地類狗所墜
及望之如火光炎炎衝天其下圓如數頃田處上兌有黃色說文
氛祥氣也侵精氣成祥也昭十五年左傳吾見赤黑之侵非祭祥
也喪氛也杜注云侵妖氛也氛惡氣也周官眠侵注云侵陰陽氣
相侵漸成祥者倍字或作背譎字或作鑄鑄僂又作穴呂氏春秋
明理篇曰有倍僂有暈理高誘注云皆日旁之危氣也在兩旁反
出為倍在上反出為僂在上內向為冠兩旁內向為珥開元占經
日占篇引京氏云氣中赤外青曲向外名為背又引石氏云氣青
赤曲向外中有一橫狀如帶鉤名為鑄氣青赤立在上名為冠
日兩旁有氣短小青赤名為珥淮南子覽冥訓云背譎見於天漢
書天文志暈適背穴抱珥蛭蛻孟康曰穴多作鑄其形如玉鑄也
如淳曰有氣刺日為鑄鑄扶傷也諸家說譎字之義各異未知孰

是各本倍譎二字誤
在天狗之上今訂正

祆氣

赤霄濛濛朝霞正陽淪陰沆瀣列缺倒景

淮南子人閒訓鴻鵠背負青天膺摩赤霄高誘注云赤霄飛雲也
楚辭九歎云譬若王僑之乘雲兮載赤霄而凌太清又云貫瀕濛
以東竭兮王逸注云瀕濛氣也倒言之則曰濛瀕字或作厖鴻張
衡思玄賦云踰厖鴻於宕冥是也楚辭遠遊滄六氣而飲沆瀣兮
漱正陽而含朝霞王注云淪陽子明經言春食朝霞朝霞者日始
欲出赤黃氣也秋食淪陰淪陰者日沒以後赤黃氣也冬食沆瀣
沆瀣者北方夜半氣也夏食正陽正陽者南方日中氣也并天玄
地黃之氣是為六氣也漢書司馬相如傳呼吸沆瀣兮餐朝霞應
劭注與王逸同卷一云淪沒也日沒以後之氣故曰淪陰淪曹憲
音倫各本淪字誤作淪音內倫字誤作淪又誤入正文今訂正楚
辭遠遊云上至列缺兮降望大壑漢書司馬相如傳貫列缺之倒
景兮服虔曰人在天上下向視日月故景倒在下也張注引陵陽
子明經云列缺氣去地二千四百里
倒景氣去地四千里其景皆倒在下

常氣

一穀不升曰歉二穀不升曰饑三穀不升曰饑四穀不升曰歉五穀
不升曰大侵

此襄二十四年穀梁傳文也穀梁傳歎作嘽歎作康范甯注云嘽不足貌康虛也侵傷也案歎饑饉歎皆虛乏之名饑與飢同意卷三云歎董少也董與饑同意歎者空聲之轉說文歎飢虛也淮南子天文訓云三歲而一饑六歲而一衰十二歲而一康韓詩外傳歎作饑歎作荒荒亦歎也爾雅康虛也郭璞音義云本或作荒泰九二句荒鄭讀為康

□□□

右影宋本皇甫本畢本吳本皆缺三字胡本據爾雅補災字與所缺字數不合即本於災下加氣字其謬滋甚今仍缺三字

蒼曰靈威仰赤曰赤燬怒黃曰含樞紐白曰白招矩黑曰叶光紀

薛綜注東京賦引河圖云蒼帝神名靈威仰赤帝神名赤燬怒黃帝神名含樞紐白帝神名白招矩黑帝神名協光紀周官大宗伯疏引春秋運斗樞云太微宮有五帝座星又引文耀鉤云春起青受制其名靈威仰夏起赤受制其名赤燬怒秋起白受制其名白招矩冬起黑受制其名叶光紀季夏六月火受制其名含樞紐拒與矩同協與叶同字亦作汁

五帝號

立春春分東從青道二出黃道東交於房二度中立夏夏至南從赤道二出黃道南交於七星四度中立秋秋分西從白道二出黃道西

交於胃十二度中立冬冬至北從黑道二出黃道北交於虛二度中
四季之月還從黃道

唐書大衍曆議引洪範傳云日有中道月有九行中道謂黃道也
九行者青道二出黃道東赤道二出黃道南白道二出黃道西黑
道二出黃道北立春春分月東從青道立夏夏至月南從赤道立
秋秋分月西從白道立冬冬至月北從黑道漢書天文志略同大
衍曆議又云推陰陽曆交在冬至夏至則月行青道白道所交則
同而出入之行異故青道至春分之宿及其所衝皆在黃道正東
白道至秋分之宿及其所衝皆在黃道正西若陰陽曆交在立春
立秋則月行赤道黑道所交則同而出入之行異故赤道至立夏
之宿及其所衝皆在黃道西南黑道至立冬之宿及其所衝皆在
黃道東北若陰陽曆交在春分秋分則月行赤道黑道所交則同
而出入之行異故赤道至夏至之宿及其所衝皆在黃道正南黑
道至冬至之宿及其所衝皆在黃道正北若陰陽曆交在立夏立
冬則月循青道白道所交則同而出入之行異故青道至立春之
宿及其所衝皆在黃道東南白道至立秋之宿及其所衝皆在黃
道西北其大紀皆兼二道而實分主入節合於四正四維按陰陽
曆中終之所交則月行正當黃道去交七日其行九十一齊於
一象之率而得入行之中入
行與中道而九是謂九道

月行九道

正月不溫七月不涼二月不風八月雷不藏三月風不衰九月無降

霜四月雷不見十月蟄蟲行五月陽暑不蒸十一月不合凍六月浮雲不布十二月草不喪七月白露不降正月有微霜八月浮雲不歸二月雷不行九月物不凋三月草木傷十月流火不定四月蝻蟲不育十一月寒不降五月雨雹十二月萌類不見六月五穀不實

正月建寅七月建申申與寅衝故七月不涼與正月不溫相應也下皆放此淮南子時則訓云孟春與孟秋為合仲春與仲秋為合季春與季秋為合孟夏與孟冬為合仲夏與仲冬為合季夏與季冬為合故正月失政七月涼風不至二月失政八月雷不藏三月失政九月不下霜四月失政十月不凍五月失政十一月蟄蟲冬出其鄉六月失政十二月草木不脫七月失政正月大寒不解八月失政二月雷不發九月失政三月春風不濟十月失政四月草木不實十一月失政五月下雹霜十二月失政六月五穀疾狂義與此條相近

月衝

衝字亦作衝漢書五行志引京房易傳云蛻再重赤而專至衝旱孟康注云專員也若五月蛻再重赤而員至十一月旱也案十一月與五月相對故曰衝衝者相對之名淮南子天文訓云歲星之所居其對為衝

日月五星行黃道始營室東壁奎婁胃之陽入昴畢閔行觜臙參之

陰度東井輿鬼行柳七星張翼軫之陰入角亢閒貫氏房出心尾箕之陰入斗牽牛閒行須女虛危之陽復至營室

漢書天文志云中道者黃道一曰光道光道北至東井南至牽牛東至角西至婁日之所行爲中道月五星皆隨之也開元占經日占篇引河圖云日月五星同道過牽牛須女虛危營室東壁奎婁胃昂皆行其南之九尺畢北七尺觜鱸參北一丈三尺貫東井出輿鬼南六尺出柳北六尺出七星張北一丈三尺出翼軫北一丈二尺貫角亢出氏南二尺出房左右股閒出心北二尺出尾北九尺出箕北六尺貫斗復至牽牛此日月五星行常道也各本皆脫亢字今補

七耀行道

山神謂之离

說文离山神獸形字亦作螭文十八年左傳投諸四裔以禦螭魅周官凡以神仕者疏引服虔注云螭山神獸形或曰如虎而啖虎魅怪物或曰人面獸身而四足好惑人山林異氣所生爲人害者

河伯謂之馮夷江神謂之奇相

莊子大宗師篇馮夷得之以遊大川司馬彪注引清泠傳云馮夷華陰潼鄉隄首人也服八石得水仙是爲河伯竹書紀年帝芬十六年洛伯用與河伯馮夷鬪文選十發注引淮南子作馮遲海內北經從極之淵維冰夷恆都焉冰夷人面乘兩龍郭璞注云冰夷

馮夷也穆天子傳陽紆之山河伯無夷之所都居郭注云無夷馮夷也史記封禪書索隱引庾仲雍江記云奇相帝女也卒為江神郭璞江賦奇相得道而宅神乃協靈爽於湘娥義本此

物神謂之彪

說文彪老精物也或作魅周官凡以神仕者以夏日至致地而物彪鄭注云百物之神曰彪餘見上山神謂之离下各本彪字譌作

鬼今訂正

土神謂之羴羊水神謂之罔象木神謂之畢方火神謂之游光金神

謂之清明

魯語季桓子穿井獲如土缶其中有羊焉使問之仲尼對曰木石之怪夔蜺蝮水之怪龍罔象土之怪墳羊韋昭注云或云罔象食入一名沐腫唐固注云墳羊雌雄未成者淮南子汎論訓山出囂陽水生罔象木生畢方井生墳羊高誘注云罔象水之精也畢方木之精也狀如鳥青色赤脚一足不食五穀墳羊土之精也墳與羴通法苑珠林六道篇引夏鼎志云罔象如三歲兒赤目黑色大耳長臂赤爪索縛則可得食張衡東京賦作罔像竝與罔象同韓非子十過篇云畢方竝鑄蚩尤居前畢字或作必藝文類聚引尸子云木之精氣為必方又法苑珠林審察篇引白澤圖云火之精名曰必方狀如鳥一足以其名呼之則去又云上有山林下有川泉地理之閑生精名曰必方狀如鳥長尾薜綜注東京賦云畢方老父神如鳥一足兩翼常銜火在人家作怪災說竝與廣雅異東

京賦殪野仲而殲游光華綜注云野仲游光惡鬼也兄弟八人常
在人間作怪害馬融廣成頌云揜罔兩拂游光游或作遊法苑珠
林六道篇引王子云木精爲遊光金
精爲清明諸書說游光亦與廣雅異

異祥

漢書五行志云異物生
謂之眚自外來謂之祥

朱明曜靈東君日也

楚辭天問曜靈安藏王逸注云曜靈日也九歌有東君篇史記封
禪書晉巫祠五帝東君雲中司命巫社巫族人先炊之屬索隱引
廣雅又云東君
亦見歸藏易

夜光謂之月

楚辭天問夜光何德
王逸注云夜光月也

天河謂之天漢

夏小正傳云漢也者天漢也
小雅大東傳云漢天河也

震實霆霹雷也

賈之言運轉也說文齊人謂雷爲賈古文作𩇛霆之言惇惇然也
廣韻云霆雷也出韓詩霹之言砰訇也玉篇霹補孟切雷也集韻

廣雅疏證

卷第九上

七 中華書局聚

云雷聲也影宋本皇甫本霁字誤作霁又誤在雷也二字之下畢吳諸本皆誤作霁今訂正

雲運也雨渠也

呂氏春秋園道篇雲氣西行云云然冬夏不輟高誘注曰云運也周旋運布膚寸而合西行則雨也藝文類聚引禮統云雲者運氣布恩普博也初學記引春秋說題辭云雲之為言運也含陽而起以精運也各本皆脫雲字今補

晷柱景也

說文晷日景也柱謂景柱也淮南子倣真訓云以鴻濛為景柱又繆稱訓列子觀景柱而知持後矣高誘注云先有形而後有景形不可亡而景不可傷

風師謂之飛廉雨師謂之萍翳雲師謂之豐隆

周官大宗伯以樞燎祀司中司命觀師雨師觀與風同風師一曰風伯韓非子十過篇云風伯進掃雨師灑道楚辭離騷後飛廉使奔屬王逸注云飛廉風伯也九辯云通飛廉之銜銜并字或作萍又作屏楚辭天問萍號起雨王注云萍萍翳雨師名也文選洛神賦注引虞喜志林亦以為雨師然王注九歌雲中君又云雲神豐隆也一曰屏翳漢書司馬相如傳召馮翳誅風伯刑雨師應劭曰屏翳天神使也章昭曰雷師也曹植詰咎文云屏翳司風洛神賦云屏翳收風則又以為風師未知孰是楚辭離騷吾令豐隆乘雲兮王注云豐隆雲師一曰雷師案開元占經石氏中官占引石氏云五車東南星名曰司空其神名曰雷公西南星名曰卿其神名

曰豐隆則豐隆雷公非一神也若淮南子天文訓季春三月豐隆乃出以將其雨張衡思玄賦豐隆軒其震霆今則竝以豐隆為雷師然離騷既云豐隆乘雲九章又云願寄言於浮雲兮遇豐隆而不將則以豐隆為雲師於義為長司馬相如大人賦云貫列缺之倒景兮涉豐隆之湧瀛揚雄河東賦云雲靈飛而求迎兮澤滲離而下降鬱蕭條其幽藹兮滄汎沛以豐隆皆以豐隆為雲也

日御謂之羲和月御謂之望舒

楚辭離騷吾令羲和弭節兮王注云羲和日御也初學記引淮南子天文訓爰止羲和爰息六螭許慎注云日乘車駕以六龍羲和御之離騷前望舒使先驅兮王注云望舒月御也漢書揚雄傳望舒弭轡服虔注亦云

青龍天一太陰太歲也

爾雅太歲在寅曰攝提格淮南子天文訓太陰在寅歲名曰攝提格開元占經歲星占篇引許慎注云太陰謂太歲也天文訓又云天神之貴者莫貴於青龍或曰天一或曰太陰太平御覽引尚書考靈耀青龍甲寅攝提格孛鄭注云青龍歲也歲即太歲周官保章氏十有二歲之相鄭注云歲謂太歲歲星為陽右行於天太歲為陰左行於地十二歲而小周是也或曰攝提開元占經歲星占引甘氏云攝提格之歲攝提在寅歲星在丑是也青龍或曰倉龍漢書王莽傳歲在壽星倉龍癸酉服虔注云倉龍太歲是也太陰或曰歲陰史記天官書云攝提格歲歲陰左行在寅歲星右轉居丑是也

甲乙為榦榦者日之神也寅卯為枝枝者月之靈也